



Reykjavíkurborg
Borgarstjórnin í Reykjavík

Reykjavík, 7. maí 2019
R19050031
6200

Borgarráð

Friðlýsing Akureyjar í Kollafirði

Hjálagt er yfirlýsing um friðlýsingu Akureyjar í Kollafirði, dags. 3. maí 2019. Friðlýsing Akureyjar markar tímamót í sögu náttúruverndar í Reykjavík. Um er að ræða fyrstu friðlýsingu í 20 ár eða síðan náttúruvættið Fossvogsbakkar voru friðlýstir árið 1999. Akurey er fyrsta friðlandið í Reykjavík og fyrsta náttúrusvæðið sem er friðlýst vegna líffræðilegrar fjölbreytni og þá sér í lagi fuglalífs. Friðlýsingarferli Akureyjar hófst fyrir um fimm árum með áskorun Fuglaverndar til Reykjavíkurborgar. Borgaryfirvöld samþykktu í kjölfarið að hefja friðlýsingarferli og er nú þessum merka áfanga náð eftir gott samstarf við Umhverfisstofnun og umhverfis- og auðlindaráðuneytið. Framundan er vinna við gerð stjórnunar- og verndaráætlunar fyrir Akurey og er stefnt að klára hana á næstu mánuðum en gerð áætlunarinnar er samstarfsverkefni Umhverfisstofnunar og Reykjavíkurborgar.

Dagur B. Eggertsson

Hjálagt:
Yfirlýsing um friðlýsingu Akureyjar í Kollafirði, dags. 3. maí 2019

Yfirlýsing

um friðlýsingu friðlandsins Akureyjar í Kollafirði

1. gr.

Um friðlýsinguna

Reykjavíkurborg, kt. 530269-7609, sem landeigandi og stjórnvald er samþykkt tillögu um friðlýsingu Akureyjar í Kollafirði sem friðlands í samræmi við 49. gr. laga um náttúruvernd nr. 60/2013.

Akurey er lág og vel gróin eyja í Kollafirði, um 6,6 hektarar að stærð, norðaustan við Seltjarnarnes. Í Akurey verpa ýmsir sjófuglar eins og lundi, sílamáfur, æðarfugl og teista, og er lundi langalgengastur, um 15.000 pör. Akurey flokkast þar af leiðandi sem alþjóðlega mikilvæg sjófuglabyggð þar sem viðmiðið er ≥ 10.000 pör. Jafnframt er Akurey mikilvæg vetrarstöð fyrir skarfa.

Við ákvörðun um friðlýsinguna var höfð hliðsjón af samningnum um vernd villtra plantna og dýra og lífsvæða í Evrópu (Bern 1979, sbr. Stjórnartíðindi C 17/1993), samningnum um líffræðilega fjölbreytni (Río de Janeró 1992, sbr. Stjórnartíðindi C 3/1995) og samþykkt um votlendi sem hafa alþjóðlegt gildi, einkum fyrir fuglalíf (Ramsar 1971, sbr. Stjórnartíðindi C 1/1978).

Hið friðlýsta svæði er 207 ha að stærð.

2. gr.

Markmið friðlýsingarinnar

Markmiðið með friðlýsingu Akureyjar er að stuðla að vernd líffræðilegrar fjölbreytni sbr. 2. gr. laga nr. 60/2013 með því að vernda alþjóðlega mikilvægt fuglasvæði í Reykjavík. Í Akurey er mikilvægt varpsvæði lunda sem skráður er á valista Náttúrufræðistofnunar Íslands árið 2018 sem tegund í bráðri hættu. Markmið með friðlýsingunni er að vernda búsvæði lunda. Auk þess er markmiðið að vernda búsvæði teistu, æðarfugls og skarfa, en teista er skráð á lista yfir tegundir í hættu og æðarfugl á lista yfir tegundir í nokkurri hættu.

Einnig er markmiðið að vernda lífríki í fjöru og á grunnsævi, einkum og sér í lagi með tilliti til fugla, sem og hafsbotninn.

3. gr.

Mörk friðlandsins

Mörk friðlandsins eru sýnd á korti meðfylgjandi auglýsingu og afmarkast af þeim hnitum sem gefin eru upp í ISN93 hnitakerfi í viðauka I.

Friðlýsingin nær til eyjarinnar og hafssvæðins umhverfis hana, hafsbotns, lífríkis og vatnsbols.

4. gr.

Umsjón með friðlandinu

Umhverfisstofnun annast umsjón og rekstur friðlandsins, sbr. 2. mgr. 13. gr. laga um náttúruvernd. Stofnunin getur falið öðrum umsjón með friðlandinu skv. 1. mgr. 85. gr. sömu laga og skal þá gerður sérstakur samningur um umsjón og rekstur sem ráðherra staðfestir. Til grundvallar samningi um umsjón og rekstur friðlandsins skal liggja fyrir stjórnunar- og verndaráætlun fyrir svæðið. Í samningnum skal m.a. kveðið á um réttindi og skyldur samningsaðila, menntun starfsmanna og gjaldtöku.



Gert er ráð fyrir að Umhverfisstofnun geri samning um umsjón og rekstur hins friðlýsta svæðis við Reykjavíkurborg sem ráðherra staðfestir.

5. gr.

Stjórnunar- og verndaráætlun

Umhverfisstofnun ber ábyrgð á gerð stjórnunar- og verndaráætlunar fyrir friðlandið í samvinnu við Reykjavíkurborg, Náttúrufræðistofnun Íslands og eftir atvikum aðrar fagstofnanir og hagsmunaaðila, sbr. 81. gr. laga um náttúruvernd nr. 60/2013.

Stjórnunar- og verndaráætlun er háð staðfestingu ráðherra sbr. 81. gr. laga um náttúruvernd nr. 60/2013.

Í stjórnunar- og verndaráætlun skal m.a. fjalla um aðgerðir til að bregðast við ágengum tegundum, rannsóknir og vöktun, fræðslu, landnotkun og mannvirkjagerð og nytjar.

6. gr.

Umferð um friðlandið

Öll landtaka frá sjó er óheimil innan friðlandsins nema með leyfi samkvæmt 7. gr. Ákvæðið á ekki við um umsjónaraðila. Leigutaka er heimilt að fara í land í samræmi við samning sem gerður skal við Reykjavíkurborg.

Hámarkshraði vélknúinna farartækja á sjó innan friðlandsins eru 4 sjómílar.

Umferð vatnatakja s.s. sjókatta og seglbretta innan friðlandsins er óheimil. Siglingar smábáta og sjókajaka, svo sem vegna útsýnisferða, eru heimilar allt árið um kring að teknu tilliti til 2. mgr. Að öðru leyti hefur friðlýsingin ekki áhrif á hefðbundnar siglingaleiðir.

Flug ómannaðra loftfara er óheimilt í friðlandinu nema að fengnu leyfi Umhverfisstofnunar. Undanskilið er notkun ómannaðra loftfara vegna almannahagsmuna, björgunar- eða lögregluaðgerða.

7. gr.

Dvöl í friðlandinu

Óheimilt er að fara í land í Akurey nema með leyfi Umhverfisstofnunar og Reykjavíkurborgar. Ákvæðið á ekki við um umsjónaraðila.

Umhverfisstofnun getur veitt leyfi til athafna í friðlandinu, s.s. til ljósmynda- og kvikmyndatöku.


Um nytjar vísast í 12. gr.

8. gr.

Rannsóknir og vöktun

Náttúrufræðistofnun Íslands ber ábyrgð á vöktun í friðlandinu, sbr. 1. mgr. 74. gr. laga nr. 60/2013 um náttúruvernd. Vöktunaráætlun skal vera unnin í samráði við Reykjavíkurborg og Umhverfisstofnun og vera hluti stjórnunar- og verndaráætlunar, sbr. 2. mgr. 74. gr. laga nr. 60/2013 um náttúruvernd. Skýrslur um niðurstöður rannsókna og vöktunar skulu vera aðgengilegar Reykjavíkurborg og Umhverfisstofnun. Rannsóknaraðilar í umboði Náttúrufræðistofnunar skulu tilkynna Reykjavíkurborg áður en farið er í eyjuna.

Aðrar náttúrufarsrannsóknir en framangreindar eru háðar leyfi Reykjavíkurborgar og Umhverfisstofnunar. Nánar skal kveðið á um rannsóknir og vöktun í stjórnunar- og verndaráætlun.



9. gr.

Fræðsla

Umhverfisstofnun hefur yfirumsjón með gerð fræðsluefnis um friðlandið í því skyni að efla vitund almennings á mikilvægi verndunar svæðisins. Nánar skal fjallað um fræðslu í stjórnunar- og verndaráætlun.

10. gr.

Verndun gróðurs og dýralífs

Óheimilt er að spilla gróðri og trufla dýralíf innan friðlandsins hvort heldur er á landi, í fjöru, í sjó eða á hafsbotni. Vernda skal náttúrulegt gróðurfar með það að markmiði að standa vörð um líffræðilega fjölbreytni svæðisins. Heimilt er að grípa til aðgerða til að bregðast við ágengum tegundum. Nánar skal fjalla um aðgerðir í stjórnunar- og verndaráætlun.

Óheimilt er að sleppa, dreifa eða rækta framandi lífverur innan friðlandsins, sbr. reglugerð um innflutning, ræktun og dreifingu útlendra plöntutegunda, nr. 583/2000, og lög nr. 54/1990 um innflutning dýra. Nánar skal fjallað um fyrirbyggjandi aðgerðir og upprætingu framandi tegunda í stjórnunar- og verndaráætlun.

Óheimilt er að stunda fiskeldi eða annað eldi sjávardýra innan verndarsvæðisins.

11. gr.

Vernd menningarminja

Um verndun menningarminja fer eftir lögum um menningarminjar nr. 80/2012.

12. gr.

Landnotkun, mannvirkjagerð og nytjar

Mannvirkjagerð og efnistaka er óheimil í friðlandinu.

Jarðrask í friðlandinu er háð leyfi Umhverfisstofnunar, sbr. 2. mgr. 40. gr. náttúruverndarlaga nr. 60/2013 og Reykjavíkurborgar og skal vera í samræmi við stjórnunar- og verndaráætlun.

Ef starfsemi eða framkvæmdir utan friðlýsts svæðis, sem leyfisskyldar eru samkvæmt öðrum lögum, geta haft áhrif á verndargildi friðlýsta svæðisins skal taka mið af því við ákvörðun um veitingu leyfis. Leita skal umsagnar Umhverfisstofnunar áður en leyfi er veitt, sbr. 54. gr. náttúruverndarlaga.

Nýting æðarfugls og sílamáfa er heimil. Reykjavíkurborg er heimilt að gera samning um nytjar í friðlandinu eins og nánar er kveðið á um í stjórnunar- og verndaráætlun.

13. gr.

Veiðar og notkun skotvopna

Öll meðferð skotvopna er bönnuð innan friðlandsins. Undanskilið banninu er notkun skotvopna til minkaveiða. Bannað er að hafa eyna að skotmarki, hvort heldur er af landi, sjó eða úr lofti.

Veiðar á fuglum eru óheimilar innan friðlandsins.

14. gr.

Þvingunarúrræði

Umhverfisstofnun hefur heimildir til að beita þvingunarúrræðum sem mælt er fyrir um í náttúruverndarlögum nr. 60/2013.

15. gr.

Refsiákvæði

Brot gegn friðlýsingu þessari varðar sektum eða fangelsi allt að tveimur árum, sbr. 1. mgr. 90. gr. laga um náttúruvernd, nr. 60/2013.


Reykjavík, 3. maí 2019.

A large, stylized handwritten signature in blue ink, consisting of several loops and flourishes, positioned above a horizontal line.

Dagur B. Eggertsson
borgarstjóri

A small, stylized handwritten mark or signature in blue ink, located in the bottom right corner of the page.

Kort af svæðinu



Viðauki I – Hnitaskrá

	x	y
1	-21,956403	64,177195
2	-21,950234	64,175004
3	-21,948674	64,171115
4	-21,948416	64,167428
5	-21,953598	64,164645
6	-21,963638	64,163918
7	-21,970423	64,165469
8	-21,974404	64,168621
9	-21,980584	64,173309
10	-21,977388	64,176977
11	-21,967614	64,179498

